



1 4
1555
226

226



門 14
1555
226

梧溪集卷第二

江陰王逢原吉

題徐孺子小像

士何以居亂世兮言欲遜而行危苟背夫聖哲之明訓
兮離刑戮也固宜昔漢室猶大木將顛兮非一繩之能
維故先生有見於斯兮蕃瓊辟而悉辭蚌以珠而腹披
兮孰若闕采於川坻金不爲燥溼而變渝兮常介然而
自持夫窮達之道同兮樂天命而焉悲矧高風軼節之
不可攀兮足以振頑懦而羞汗卑像載拜酒載薦兮微

昭和十九年
四月十日
購求

先生而吾誰師

懷賢懷王光大 有引

光大宣州太平縣人世大族從文節汪公明春秋科
舉罷學古詩文於逢有神交之道因慕梁鴻之懷高
恢也作懷賢一章

姓吾同兮道吾同神相交兮見無從孰謂今人兮無國
士之風

懷德懷王先生 有序

王先生諱森字道山建德人性機警夙喪父得廢疾

母患其生業未植聞有道士黃雲西自陝來推人命
若神俾先生贅見之白其故黃慨然納爲弟子盡傳
其學冠遊術大行母賴以壽終江西省達官側室被
幽置數年一日召先生推其命先生曰是婦當因子
而貴且容德全眞賢媛也達官感悟見其子歡如初
內御史篤敬夫之父靖江公居信州永豐素無子後
得御史於其侍婢母夫人嫉之先生時挈家是邑得
所生辰輒颺言曰異日狀元也夫人知愛若已出年
十九果及第世服先生長者也至正壬午逢侍先君

之永豐首幣見問所奧喜謂曰子姑習儒俟子旋里
當不辭千里行以授所蘊竟如其言畱江陰三閱月
逢送至錢塘先生訣別曰吾瞑目有日子行負大名
幸毋忘逢受命惟謹先生抵家大會親友凡七日無
疾而卒壽六十七子三先生貌古怪明洪範易素問
名公卿道過信率遣使致書饋或卽其廬禮焉先生
多本君平之言荅之始先生薄游永豐豐之人尊信
恐後爲築室娶婦買田園畀之或躡躡出閭巷人爭
候款閒畱旬月而返猶洛人之事康節翁也如是者

三十年特爲逢一出及還遂長逝嗚呼哀哉作懷德
一章

髮種種兮衣巾道吾傳兮忘吾貧來爲死別兮舉初志
山迢路脩兮再見無因於乎孰謂先生兮今世之人

命婦詞二首

涼風灑魚軒纖月照蛾眉瑤琴歇清奏更點何其遲
鯨深跋浪良人海中坻不死盜賊手爲是千金兒隱忍
就功名未路將有爲念昔從征日堂堂天王師星羅烏
蠶船雲布蚩尤旗號令非已出三軍血流漸秋高氣蒼

然蕭藿零露滋河漢橫閣道孤鴈鳴多時夜闌燈結花
試卜歸來期

寒月照象服乃在深房權蘭蕤馥甲帳憂心獨沖沖良
人忠孝門載筆明光宮日賜水晶鹽夜繼蓮炬紅推恩
到箕帚雙闕九穹隆燕鴻天北南牛女河西東補衣無
失遺抱衾甘長終兵戈浸蜂起篁竹嘯悲風山川路相
繆十信還一通雲臺漢光業石鼓周宣功相望善終始
目冷青青松

舊衣篇唁失位者

舊衣邱中麻新衣陌上桑桑蠶輸蠶絲染織雲錦章麻
成布在軸皎白如雪霜皎白貧賤空妻著奉姑嫜夫今
位上公紈綺魚貫行身被龍五爪賜自吾天王既貴習
乃移舊衣棄固當沐猴且冠帶輿儻尚銀黃腐儒餘束
書芟製松桂航薄遊滄江岸事至涕忽滂狐裘三十年
德盛國益強青氈一微物偷兒亦驚惶願言收所棄澣
濯還暉光顛倒慎雞鳴厭浥防露瀼椀筍復虛設鼠櫪
卒壤傷春風花落時盍記雙上堂古來弊帷葢猶備狗
馬藏新衣窄從短舊衣寬較長聞歌舊衣篇舊人詎終

忘

奉謝楊山居宜慰寄遺蠶紙

明公枉珍遺開緘霜雪色自非玉女春必假天孫織剡
藤失淨薄海苔無光澤元是祕府藏親向御手得秋風
柿葉館筆研久荒寂飛來一朵雲列第厭金碧如何上
所賜波及滄浪客焚香再封裹還坐翻太息盜發唐昭
陵無復晉墨蹟願茲抱貞素恬閱世代易尚憐先代時
龍翰盜邦國蠶繰盡輸征鶉結曾不惕吾元本恭儉世
祖膺聖德羊駝代白麻逐雨混區域倭用幾何年離亂

亦以極明星爛河嶽雞叫扶桑白當寫大寶箴直上玉
階側詎敢輕點灑令人卻湔滌

無家燕

嗟嗟無家燕飛上商人舟商人南北心舟影東西流芹
漂春雨外花落暮雲頭豈不懷故棲烽暗黃鶴樓樓有
十二簾一一誰見收衆雛被焚蕩雙翅亦斂摯含情盼
鬼蝶失意依訓猴茅茨固低小理勢難久畱昔本烏衣
君今學南冠囚燕燕何足道重貽王孫憂

題天台陶宗儀母趙縣主德直墓志銘後趙豕出

汴宋至今人猶以縣主稱之

陶母趙宗室貞靜白雲姿明璫秘水珮幼小比光輝自
通良人姓三星天一涯孔雀金繡屏十年夢參差手製
丹霞帔及嫁不稱時造次井臼閒跬步必中規良人既
祿仕婉婉黃髮期落月鑒綺疏春霜薄羅帷生而賢且
淑焉用壽考爲銘旌書縣號琬琰瘞華辭念昔岐山鸞
其德未云衰王風遽淪變無卷慨今斯烏鵲橋銀河青
鳥使瑤池何如五采羽來儀竹梧枝梧竹日夜長雨露
深孝思孝思人子慕爲述二南詩

古孝篇贈軍曹陳貞

軍曹例視爲軍役不丁憂而貞能行之貞讀書雖人

走有跪乳羝飛有反哺烏誰使人無親不以喪制拘卓
哉軍曹掾嘗事鄉大儒親老得抱關尚敢辭卑污寒城
落葉暮聞訃卽就途公侯苦遮畱泣告奚他圖孝居百
行首違孝忠焉輸二軍各縞素送別恐踟躕我適遇諸
野感動復歎吁國家猶大木百世雨露濡不知衛本根
立見枝悴枯吾元敦孝治王風諒交孚苟能外夷俗悖
犯無足誅著茲古孝篇何當鑒狂愚

秋夜歎

大星芒鬣張小星光華開皇天示兵象勝地今蒿萊河
岳氣不分燭龍安在哉參贊道豈謬積陰故遲回疎風
夜蕭蕭野燐紛行來安知非游魂相視白骨哀汨汨飲
馬窟冥冥望鄉臺於時負肝膽慷慨思雄材

積雨齋居

積雨生夏寒盛陰失朝景白鳥巢依閣青梧葉垂井幽
觀知候變遠引忘世梗淮水方浸淫吾甘繫煙艇

獨夜

獨夜臥齋館斜月半窗白露草溼熒熒水禽啼嘖嘖神

超赴清瀾慾寡忘久客蓬萊在市朝弱水非

帖侯歌引

昌國州達魯花赤高昌帖木兒平章買住之

海寇犯境侯連甲戰破之衆寡不敵或勸侯遁

曰是我死所也遂死之江浙省參政樊執敬為文道

使致祭請諡於朝作歌云

仙居縣丞寇海邦白晝突入千矛鏑帖侯親騎大宛馬

快劔公摧鋒須張背剌赫如虎殺武

胸腹擲地血飛雨短兵未接寇偃鼓天南弧矢夜掩光

狼角赭赤雲元黃洪濤鯨鯨去咫尺再戰身與城存亡
艤艫千百水犀手主者誰欺仆友走岳立不轉縱殺之
殉忠國家良亦厚君不見台州牧長金兜鍪氣節自
名臣流情鍾兒女挫堅銳卒墮賊計空貽羞男兒真偽
那料得長松古柏寒增色鴻飛冥冥我何及落日荒山
淚橫臆

孝僧行

天姥山中好慈竹竹上慈烏鷓竊宿小鷓飛隨白鷓鷯
學念觀音淞水曲觀音念得孝感生一啄一飲難爲情

故園花滿紫荆樹春雨春風啼野鷺僧康辭親今十載
堂上手縫衣帶在關梁阻絕音問疎霜露侵尋根改
根改兒身長兒身徒長無羽翼兒心不定空飄揚祇
殘瞻雲雙眼淚夜灑黃金獅座傍

孟郡王印歌 有引

宋太師信安郡王諱忠厚六世孫崇月同知集復得
玉所佩印於中吳里第古牆下逢歌曰

黃葉道左秋風前故人解后句愴然手持古印不敢釋
卻立哉拜徵詩箒印銅空青幾風雨斤斤居牆下土

堂燕頻移百姓家官物猶存郡王府宋朝前後十六主
外戚功臣三四輩至今王氏孫獨賢為有詩書繼鄒魯
我試拂拭生耿光象文蔚然龍鳳驥歸而寶之金玉相
公侯復始世其昌

則天皇后玉璽歌楊山居宜慰徵賦

皇朝內府多寶璽盡畀大師

後三十一顏丞相

作鷹隼黨臣勢

焰同薰天亦得分為玉押字武后佩璽雪瑩如璞薄

深難改圖當時收藝文監此獨善後咸驚吁戶

改寶氣息斤墓至今華表直天遺尤物鑒來者

聞秋四壁月落雞鳴大江白

松石歌壽劉澹齋總官

吾聞弭山

在處州

之上松林稠樛枝連蜷陰蔽牛儲英孕

秀三千秋精靈夜逐仙人遊仙人氏葉喬松儔棲神鍊
魄道竝修功成朝帝白玉樓雞犬亦得沾餘休彼辭斧
斤謝薪檜化為異石森琳球好事深入窮冥搜不遠千
里貢劉仁劉侯置之軒檻側波濤之痕雲霧色盤根錯
節不肖直戴癭銜瘡裁咫尺瓌奇合有神護惜偃蹇欲
與天終極閭闔風來翠成滴昆侖日下光相射春生寒

盡土花蝕驥伏龍驤勢俱敵時時青嵐紫煙幕沆漑淋
漓收不得翻愁雷公鞭霹靂取向鴻濛女媧國劉侯自
是天門客大手真能補天圻乘槎路遠銀潢隔老臥江
南一區宅賓筵大開浮大白香重光寒凝琥珀霓裳曲
停第三拍聽我狂歌墮巾幘松兮石兮壽千百

故將軍歌

有引

故將軍歌哀上萬戶蒙古氏丑厮侯也侯子靜如以
世勳佩三珠金虎符官昭勇大將軍鎮江陰謙恪尚
義人悅慕之至正十一年淮西亂督軍九江取道安

慶時湖廣威順王在道王聞侯頓兵卽帳下以退守
地虛弱強侯爲張飲之會宣讓王遣使諭旨曰安慶
控淮江要衝命侯就鎮前後出師凡二十九捷十二
年冬十一月寇悉衆水陸竝進侯連破之翌日復大
破輕舟追後中流矢卒是月二十九日也二王哭之
哀給白銀五十兩賻其葬先是逢與宴侯第時海內
無事嘗謂侯曰不歲在辰侯當保障一方戰勝恐後
不利盍慎諸侯荅曰大丈夫勦力王室死無憾也侯
事親孝征閩寇衛海漕咸有功云

將軍舊乘青驪驕蒼龍金虎雙輝光揚旌伐支靖蜀徼
山鬼迸落黃茅岡長鯨噉呀欲東噬以身打海民樂康
十年楊柳蔭環堵一夜苜蓿空沙場淮江蕭條咽流水
殺氣妖氛亘彭蠡提兵假道古舒州親王遮畱勞玉趾
上言三邊賊緣蟻將軍不止我其死月氏髑髏酒數升
品重秦華輕邱陵儲胥孤懸使雜守睥睨危急期元登
萑蒲獵獵開金翅篁竹深深攢鐵菱長驅大捷二十九
生俘千人梟萬首猙獰健兒駿奔走電掣雷訇若神授
東南瘡痍合未蘇終焉性命豺狼有仲冬炎風動地吹

太陽血赤芒星垂將軍

一羽百中之弓撥矢鉤天爾爲

蕉丹荔芳菲菲保阨千里今誰祠霜繁雪稠侯我

送宋宗道歸洛陽

選郎分手楚天涯萬里春明穩到家庭下已生書帶草
馬頭初見米囊花汴淮淡澗梁苑星斗參差犯漢槎
中國未應風俗異舊京寧覺路途賒鮫宮獻珮當明月
鶴馭吹笙隱太霞貂弊世憐蘇季子賦成人哭賈長沙
若爲撫事傷一跡正用懷才待物華聞道鄉園諸父老
汶蔡期看馬卿車

寄謝靳士升分憲過舉遺逸

朱紱銀魚古詠臣紫髯驄馬異常倫百司揚厲風霜節
一道涵_一露辰幕靜柏陰高轉午庭深花萼暖輝春
臺評屢_一天朝聽社署曾聯宰相裊雲路隨鵬直上
泥塗今見蠖初伸行囊何有惟書劔歲晚相攜願卜鄰

昆陵秋懷有後序

老兵為_一劉_一瓦_一坐舟中思滿襟元武城危寒日短
紫駝塵暗朔風留_一不盡新亭淚天地長懸卽黑心
不祚未移中道死至今劔井蟄龍吟

至正甲申秋八月逢金陵歸泊常城下有老兵能道
劉都統事劉名師勇山東文安縣人也少英銳涉獵
經史包恢平長興盜師勇與有功授都統制守濠至
元之十一年王師渡江逼常州時宋德祐元年也春
三月知州趙汝鑿遁通判錢彬以城降與宋鑑少異師勇
前已入衛至是與都統王安節殿帥張彥受命克復
之以姚嵩知州事因其樹柵鑿濠為扞禦計夏五月
安節自呂城出迎王師戰不利彥尋以衆降且迫彥
招嵩嵩罵曰若食國厚祿不能死難反說我耶狗彘

辱吾唾冬十月大軍圍城數重宋丞相文天祥發兵
來援連戰不利降臣呂文煥射書入城諭以禍福流
矢中之文煥怒白伯顏丞相建鉤援之屬晝夜力攻
餘五十日師勇登埤表創拒戰且曰吾城卽破金山
長矣丞相因識其語命昇金山寺沙門問計沙門實
無計諉言城狀如龜擊其尾則四足披露矣十一月
用牛馬革爲屋以蔽矢石趣死士相銜輦土填塹灌
脂砲中焱焰枯發急攻南門城遂陷嘗戰死安節被
執終死不屈師勇從八騎手殺哨騎數十百人易其

衣甲以混北軍裨將張超墜馬師勇斬其頭以給衆
曰亟追劉都統所向披靡得從閒道赴行在扈二王
入闔下紹遺疽發背卒江陰孫謨所傳亦然特
少異耳師勇嘗經江陰悟空寺時烈寒冰血膠手湯
解之射一箭於寺塔意氣慷慨復題詩於壁乃去孫
能記評之或曰國初吳城外僧舍有一老僧長七尺
許居十餘年未嘗面北坐人詰其姓名輒不荅死之
日僧開視其篋笥有師勇官誥豈其人耶抑其騎士
耶不可考矣逢論曰趙宋苟安吳會姦臣擅權國以

殄瘁天兵所臨望風渙散襄陽一文煥以孤軍抗守
六年卒以援兵不至而降失江漢蔽因以危亡師勇
與豈智勇足以濟難職分所寄僅得收復一城率創
殘之卒以禦百萬之師雖古雄烈蔑以加此言之死
綏亦足愧死汝鑒彬彥之徒矣師勇智略絕人其軼
出重圍可謂驍將戰之不利天也扈王入閩猶昔人
卽墨之志事之成敗君子有不論焉文丞相嘗謂滿
城皆忠義鬼是誠德化所致若安節出處大略視強
毅不屈凜然有烈士之風嗚呼偉哉

送任子羽赴太醫院辟

天醫臺院五雲深曳紫腰犀雜珮音中使日供駝背酒
六官時賜裏蹏金丹砂鍾乳來南國赤箭青芝滿上林
知爾去鄉承薦剡贈言慚比太和箴

寄謝貢司業枉訪

碧雞坊裏皇華使沈香亭前宮錦袍五月江城駐車轍
百歲野翁觀節毛不及將迎具茶果應訝環堵翳蓬蒿
至今驪珠照篋笥夜夜令人魂夢勞

贈顯上人

陰陰萬木蔭孤村
雞犬無聲日閉門
河海自隨儒化遠
山林惟識梵王尊
石潭龜上青蓮徧
玉笈蟲書貝葉昏
偶說漢家來白馬
欲從蔥嶺訪昆侖

夜宴葉氏莊曉登悠然樓作

百尺飛樓俯碧湍
六峯秀色遶闌干
杏花落盡東風惡
燕子歸來社雨寒
夢裏香煙生繡幌
酒醒紅蠟膩銅盤
一春樂意朝來好
千里家書席上看

送朱自明辟閩憲奏差

閩中烏府小清都
列郡山巒紫翠紆
王化直來天北極

文星多聚海南隅
暖塵花氣隨驄馬
春日榕陰滿鷓鴣

況有翰林持使節

時歐陽學士除閩使憲郎應得效馳驅

奉簡劉澹齋總管

南極天高動壁奎
青山落日夢金闈
花開春竝連錢馬
竹下晴看吐綬雞
漢室二疏遺跡在
建安諸子大名齊
闕干角畔梧桐葉
吟得宮詞細細題

送吳伯暹遊武當山得試心石命題

紫霄之巖千仞高
上有一石懸根牢
劍客無地露肝膽
肉身昔年生羽毛
北極虛危夜氣肅
中州豫雍風物豪

送君此去攬神秀應鄙望夫雙眼勞

夜宿宗陽宮簡俞明元縣尹時自德興棄官將歸

吳門

六月仙家冰雪壺一簾荷氣簟紋鋪圖書天府占東壁

道德清光揖老儒五柳得成超晉宋三苗民化樂唐虞

公嘗為荆湖帥幕歸舟誰盡傳經禮玉珮金魚擁道隅

奉題先世所藏巖子陵小像有後跋

千仞臺臨七里灘羊裘鶴髮老魚竿客星帝座分天象

潁水箕山竝曉寒遂起後塵甘黨錮尚存餘烈愧南冠

桂叢萃蕞蘋花薄悵望高風一羽翰

客星犯帝座當時天象已示光武之為帝座子陵之

為客星太史又奏如此雖讓萬乘位與之不屑也博

士范升之奏固謬拜子陵諫議大夫其大失歟然則

子陵蓋巢許其人也

題馬洲書院有序

馬洲書院者孔聖五十二代孫元虔昆弟之所建也

元虔五世祖若罕高抗不羣長於春秋當宋南渡自

關里將之衢畱滯泰輿見河流達南江詢之老人曰

此龍開河也西北通淮泗因歎曰吾洙泗龍泉之支流其在茲乎遂築室河上與其子端志各授弟子業從遊日衆乃有菑田百畝人助以力官復其稅戒子孫治生勿求富讀書勿干榮邑大夫嘉之易名龍開河曰敷教示崇化也年六十卒葬河之陽端志克守父道薦辟悉不就淳祐元年冬邑燬於北兵元虞避地是洲咸淳閒書院落成教授復如初然皆無後今崇聖寺旁惟破屋蔓草遺像瓦爐而已逢懼變遷殆盡故敘其概於壁閒庶望後之起廢者得以考焉詩

曰

料斗秦皆廢靈光魯獨存豆邊漂海國丹臚暗淮村苔
蘇花侵礎蒲蘆葉擁門青春深霧滌白日老乾坤德化
三王竝威儀百代尊郊麟初隱遁野兕遂崩奔先輩俱
冥漠諸生罷講論斷編塵楹冷遺像網蟲昏盡變衣冠
俗終歸禮義源江南游學士瞻拜敢忘言

送郡知事李仲常還金華

列郡歌岑晙孤城頌李膺文華仙掌露人品玉壺冰畫
本黃筌學詩兼畢躍能關河千里道風雨十年燈薦鴛

知無忝登龍貴早承朔雲低紫禁東壁映青綾郎署新
帷幃儒門古豆登龍梁初隱見檄遂飛騰軍事諸曹
服元僚太守稱芙蓉秋獨臥驃騎日同與眾仰寬民力
誰堪作帝肱掃除塵瀕洞屏蔽雪侵陵野戍銷鋒鏑田
家罷棘矜昆侖天柱正宸極秦階升顧此心常切多君
興遠乘崇桃紅霧斂豐草綠波增喻蜀漢司馬歸吳張
季鷹宦情輕比蛻行色澹於僧三洞金晶發雙溪白練
激過家饒賞咏來紙細細藤

奉題薛茂宏所示藏經序銘後

附序銘

北斗道經一卷故太史清江范梈川書貴溪薛毅夫
奉而藏諸禹穴承母命也母倪姓諱瑞真世大族生
於至元之庚寅生之夕父母都扎于元燭於庭故長
而事斗極虔日誦其經年十九歸薛昶氏昶蚤卒時
甫三十孀節卓偉訓毅夫詩禮為名士毅夫一日過
清江謁太史告以故太史為書經俾之歸遺母母得
之喜曰比夜夢汝執經我側今致此非偶然也吾百
年後可藏諸名山慎毋忘暨毅夫終母喪乃上會稽
詣禹穴藏經已而屬太史氏襄陵張翥為之銘銘曰

禹陵之洞陽明虛中閔玉匱遁甲圖孰敢窺之神所
徂有孝子毅精誠孚斗七宿經史竹書元默攝提月
在如翥也作銘古作謨歷厥世百文甫渝後有道者
其徵且

薛母高門女生時斗燭庭紅顏斑竹淚白首蕊珠經鶴
遶香千匝龍辭海獨聽妙音遺香眇陰德著幽冥月墜
朝朝鏡雲生夜夜軒翰林留製作禹穴護精靈地接曹
娥廟天低婺女星輝光同百世事跡有餘馨

送太常奉禮郎劉仲庸以二宮命使南省織金段

龍帳還京師二首

澤國李膺舟風霜季子裘家依南越鳥身適大宛驕甲
乙帷虛夜蓬萊殿敞秋到京王母喜休語萬方憂
秋風吹蕨薇宮使別鄉闈中夏蒼黃色孤舟錦繡輝句
驪龍晝偃瑤水鳥雲飛萬一回天睠均裁大布衣

辛卯仲冬廿四日吳山游望

虹霓生海國薄暮太陽通徑掩廣寒殿橫經長樂宮暈
浮蛾黛綠氣雜蜃樓紅願得為龍袞端垂我聖躬

鷓鴣

蒼莽炎州地生成五色文不司天上曉常吐日邊雲孔
翠名雙重鸚鵡類孰分祗宜駭巨室切莫誑明君

藤

詰曲紫藤樹檀欒蒼葉敷時時上蠹蜒夜夜走鼪鼯雨
露不偏沐風霜先自枯深求造化理重笑水中蒲

送靳利安之常州同知經橫林洛社舟中二首

金湯遲建節班白半為魚煙冷魚商市霜晴鳥雀墟丹
心憂國徧畫舫上官初素著循良蹟綏民早駕車
敗冰流滿川茅舍啄烏鳶垂喪期頤老猶傷乙亥年亂

離今日繼風俗幾時遷洛下衣冠族宜先解倒懸

感宋遺事二首 有引

支漸資陽縣民元豐閒母喪躬負土葬賴錫山中廬
於墓側布素糲食而已日三時號慟有白黑雀各雙
巢墳松閒斑狸白蛇兔每自山下來顧視漸久之方
去又有白鴉及五色雀千萬餘圍繞縣令以聞勅特

賜粟帛

支漸元豐士浮沈四百年孝曾蒙帝寵名復待予傳白
兔歸蟾窟青松合墓田感懷龐禮部不忍釋遺編

高處士名繹長安人有古人絕行慶歷中召至京師
欲命以官固辭歸山特賜安素處士家貧妻子寒餒
鄉人或饋以財終不以困受閉門讀書而已昔王霸
憐其子蓬髮投耒愧臥不起前賢之所難處士蹈之
有餘裕也嘗見古老說种放隱終南山召拜起居舍
人賜告西歸有一高士隱居三世以野蕨一盤詩一
篇贈放云接得山人號舍人朱衣前引到蓬門莫嫌
野菜無多味我是三追處士孫放國史有傳若夫志
意脩則忘富貴惟安素可以無慙矣南安龐元英文

昌錄中所紀如此英嘗爲神宗儀曹官

長安高處士氣得伯夷清安素承殊渥歸來遂隱名雪
寒深屋臥雨夜一經橫太白鴻飛闊思瞻紫翠晴

塞上曲五首

木葉滿關河轅門肅珮珂將軍提劔舞烈士擊壺歌月
黑輝銅獸風高嘯紫駝不堪城上角五夜落梅多
將令傳中閫交驩浹兩軍地形龍虎踞陣伍烏蛇分清
野輝燕日黃河瀉岱雲生靈如有賴絳灌不無文
月照小長安風生大將壇虎皮開玉帳牛耳割銅盤霸

氣寒逾肅軍聲夜不驩
皇天眷西顧慎取一泥丸
儻革帶鉤膺聯鑣獵楚陵
白肥霜後兔青沒海東鷹
千里榛蕪闢三年秭穀登
中郎示閑暇呼酒出房烝
諸夏皇威立三邊虜氣衰
角弓分虎圈乳酒下龍墀
蠶午歆氛遠鼉更窟宅移
輿圖欲盡入中道勿頒師

聞武昌廬州二藩王渡海歸朝

茅土分封在金章渡海歸
事殊生馬角心愧著戎衣
星月晶光竝山河帶礪非
秋風紫塞上依舊鴈南飛

贈李宣使

秋水淨菰蒲天風送舳艫
海雲紅日近江國使星孤
帝運無盆子戎行有亞夫
傷時恨離別林下重咨諏

和張率性推官小遊仙詞四首

西王春宴百娉婷玉碧桃花滿洞局
自飲一杯瑤屑露
東風吹夢不曾醒
銀河澹澹月輝輝洞草巖花夕露微笑踏青鸞作龍馬
九天涼動五銖衣
雲幢煙節紫霞裾齊御冷風集步虛若受人閒塵一點
長門又屬漢相如

雙成今是五雲仙得捧長書玉帝前天上星河春似海
人閒風雨夜如年

登雙鳳普福宮東樓贈吳道傳時周境存隱君同

席

道人獨坐覽輝樓海底青天八座流燕子飛來又飛去
游絲挂在玉簾鉤
樓殿岩巖上赤霞水紋蟠鳳臥靈槎石碁盤靜香煙直
簾下雙頭百合花

題王若水墨鳩

澹竹花開碧草叢日暄風靜見沙蟲鶉鳩不忘相呼逐
偶與孤臣飲啄同

送堅上人歸省

高堂鶴髮不勝簪大地叢林已徧參好去雕闌認春草
草中萱是舊宜男

題焦白所畫其父奉禮府君夜直詩意圖 有引

憶昨停驂便殿西柳溝風軟絮霑泥一彎月子梨花
上冷浸香雲伴鳥棲右社稷署奉禮郎焦君追念先
朝眷遇之隆而作也君諱文炯字仲明淮陽人也少

通敏由文皇東宮時說書為前職而卒白君之次子也日誦其詩尤拳拳孝思不忘於心乃手寫詩意圖屬予和其上詩曰

露溼金莖月轉西披香太液淨無泥梨雲散盡千官影獨見桐花小鳳棲

題林芝隱所藏龔翠巖臨昭陵什伐赤馬圖附龔詩

翠巖名開宋季淮陰人自題云赤驥馱僧去玉關換他白馬載經還誰憐什伐蜚龍子贏得金創臥帝閑風雨昭陵戰伐秋赤流汗血尚成溝畫工解貌千金骨

不抵東家牛戴牛

題馬和之園有桃詩意圖

華髮無情賦黍離何堪畫託衛風詩漢皇日宴西王母合賜東方酒一卮

避地梁鴻山六言四首

舍邊新花夜合井上老樹冬青孟光齊眉舉案倪寬攜鋤帶經

三百銅錢斗酒一雙蠟屐千山莫問雲浮富貴且消天與清閑

北里戎衣袴褶南鄰墨勅斜封多我幽居水竹有誰高
臥雲松

風塵涉五六載忠孝錄數十人已判詩移白日更須藥
駐青春

重題余常清雲林四首

花搖暖溪雲蘿裊春嶂月高坐無來人清琴數聲發
葛巾灑風涼桃笙臥月色意行嘉樹林濃露如雨滴
鶴鳴山館晨魚跳野塘午如何涼已深菰蒲數聲雨
積雪欹巖松回風簸溪篠道人不知寒焚香坐來曉

秦孝友先生迎享送神辭

有引

先生諱玉字德卿少游之裔受學於蛟峯方公隱居
崇明淑門弟子若干人先生卒門弟子以行業私諡
孝友請祠於州庠其子崇德儒學教授約徵迎享送
神辭於逢辭曰

海東隅兮三洲宅龍龜兮蛟龍湫羌聲教兮邈悠靈斯
藏兮道斯修道不行兮長邁祠學宮兮子孫永賴日薄
渚兮風林鳴如聞音之警茲楚葵青兮靡靡牲甚肥兮
酒甚旨皎白駒兮焱馳儼衣冠兮戾止有聖賢兮依歸

川魚泳兮鳥雲飛靡潛伏兮弗昭著靈自今兮欽孰違

維杭美沈省掾從董參政出師有功 沈名兼善

維杭大藩阻江負山千秋獨松昱嶺其關草風則塵潦
水則瀾帝十二載民脅寇蠻遂據天險遂肆冥頑相命
董公以靖以安公成巖巖公師桓桓公佐孔文弗猛而
寬曰彼霜露天用戒寒若 山 戈胡寧野丹民信不疑
駢壺聯簞市如其歸堵如其觀既肉我骨復完我殘昔
顛而飢今坐而餐羊牛雞豚亦充於闕社賽廟享鬼神
具歡佐我父母公我王官匪父母私佐才實難溪激其

湍嶺業其盤陵夷谷湮德功不刊

復三關美沈都事

帝十六載盜起昱嶺蚊蚋全入螻螟附逞黔黎煽變郡
縣傳警相臣先見兵且徐整乃詢於塗乃咨於省僉謂
沈公遺愛是境俾佐廟謨往則綏靖公勇承命星駕露
舍有單其童有隻其馬扶攜偶旅叩首馬下始公未來
龍蛇草野及公復來雞豚井社冥頑不靈陶之坯冶顛
連無愬庇之大厦摧輪於欹蹶踉於危王良韓哀安乎
驅馳既貸以生又訓以辭常人之恩僅止父師鯤魚躍

矣必邀天池欲祝之福有詔在達重關峻厓含精曜曦
勒茲頌言永我去思

望江郎石

仲春天氣佳萬象忻改色我行六峯外遙見江郎石二
儀闢混沌牽牛委晶魄鼎列台輔姿玉蘊珪璋德三神
浮瀛海噴薄東一極鉅鼇因戴之仙宮晃金碧斯連厚
坤軸乃棄姑蔑域直上青蓮花或隕樵舍側安知非異
境自與二神敵於時攬深秀雲霧忽巾冪微風稍飄颻
空翠疑亂滴雜英敷陽豔嘉木生午寂交交黃鳥音好

在千丈壁三年思晤對百里今咫尺煙波動落照道路
陰已夕尚戀女媧功躊躇望西北

周處讀書臺

偶遊鹿苑寺遂登孝侯臺當時斬蛟虎折節事賢材詩
書夜繼日與義旋兼該篝燈委紅炮挂劒蝕青苔默語
三十篇若出造化裁純誠被幽魄勁氣躡上台翹翹母
望深急急將命催孟明哭蹇叔子路死孔惺天不卹忠
良寧馨真禍胎吾儕千載下野衲相侏佻秋原風藿慘
夕殿薊花開白馬從素車恍渡秦淮來故都凡幾姓醜

地餘劫灰此臺異呼鷹靈光共崔嵬私傷過英武不得盡奇才

送篤御史自永豐遷生母葬北還

春城澹欲秋晝日黯不輝諫官素車馬南州護喪歸歸程數千里居庸山光紫野桑鳴雉鷲津柳巢烏子時清無虎豺薤露歌侂生芻豈無人親戚羅上台淑魂久鬱鬱今得歡從匹牲碑凌雲霄墓道臨警蹕為母有此郎百世餘耿光願言移孝節終始奉君王

題程員外撰汪夫人傳後

傳附

弱齡身服苴盛年髻束髮孤生況新寡不謂壽命遐牆陰斷腸草牆外合歡花衰榮異本根且復藝桑麻桑麻日以長雨露日以養夫幸從弟賢命子承祭享洋洋靈在天蒼蒼天在上忍為奔月娥冥心共泉壤

夫人名悌婺源下港里程昌文女也四歲父死於兵事母汪以孝聞伯父草庭先生憐之選嫁名家子汪德裕生一女而寡公姑懼其不能安也使問之對曰妾不幸夫亡尚幸公姑在得備奉養何忍更適人或勸之曰夫人年少無子不以此時從良人後將何悔

夫人曰吾聞女不事二夫夫天也天一而已夫死而
遂去之是背天也背天不祥或又曰夫人今嫁幸而
有子不猶愈於持孤身託冷室乎公姑固不汝望也
何乃自苦夫人泣曰雖然吾父蚤世吾母守志數十
年至今吾身一爲汪家婦也知死汪家而已奚恤其
他里之富人因媒妁具聘幣伺閒以請者數輩夫人
卒不許家貧紡績自給課童奴樹藝歲時奉祭祀如
夫在時公姑卒喪葬盡禮今年七十餘矣老猶執女
工不倦閭里姻戚稱夫人之德無閒言初德裕從弟

澤民幼附夫人夫人子畜之及澤民長乃立其子梓
爲裕後以奉夫人梓事夫人益孝謹如實生已程文
曰子從閣老著書睹春官旌表節義事甚悉率多京
畿內郡之民間閭幽遠蓋罕焉及讀陳助教繹曾作
夏侯玉珍傳許汴鄉善錄載許伯冬妻頗與汪夫人
類皆節義卓卓羽翼名教朝廷著旌表之令以風勸
天下而有司莫之省使志行湮鬱不顯白於世悲夫
子弟爲平江幕官嘗言某帥妻詣官自陳願上所受
封北齊民得再嫁嗚呼以禮防民猶有踰者若是哉

予故論著汪夫人之事以俟察民風者覽焉

題華亭呂氏伯仲德恆德厚市義卷

百里不販樵千里不販糴君家獨市義人用羞貨殖璜
溪流湯湯闔境咸飲德頎然先處士首倡扞寇敵生死
肉骨餘老稚仍仰食時平倏翫逝二子承世澤焚券責
報天焉計鉅萬石田文昔舉此史稱多賢客豈若伯仲
閒惠施木心臆我浮五湖舸撫卷增歎息日青野蒼涼
靡靡新煙白昔如鹿犄角今比烏戢翼襁負歸流亡來
遊復阡陌官曹得公輩自足蘇民力重懷吳泰伯三以

讓去國淮南尺布謠同氣有遺戚贈言廣孝愛福祿將
永錫

贈錢掾袞

錢塘錢慶餘系出吳越後眉豐目秀廣質礦氣冲厚家
乘久壙僚青氈遵世守放膽論道義小心取升斗晨昏
曲奉養及親未白首親終表其墓翠琰照林藪宗弟爲
人奴恐辱大父母贖歸故閭里甘苦願同受孝誠出天
性薄俗所未有兒也弄文墨婦也躬井臼衣冠俎豆問
捐遜動曰某千年不平事醒醉嘗在口鎮西陸將軍遜

廟食采地久沁人媚淫祀加置神木偶上疏乞去之以
時致牲酒豺狼恣跋扈鷹犬迫飛走衆方立殊勳而甘
伏田畝行藏悉無愧所愧寡知友竹光青連楊蘭豔綠
當牖篇詩涉教化每諷賓客右我嘗駛風帆臥數峯過
九鱸尊一水外念子非狗苟遭亂顛躓餘始得屢握手
高盟沮金石雅興謝塵垢偃蹇七尺軀相視覺老醜春
芳到鷓鴣生意付蒲柳勗哉令善名是則窮谷叟

觀錢塘江潮時教化平章大譙江上

蒼蒼吳越山對峙東江腹江開白銀甕一浪天四蹴金

鼎王高秋風露氣轉蕭肅常年駭壯觀委巷雷擊鼓今

官增威旌麾被川陸羅衣繡龍鳳玉帶瑒蠶粟牙牀錦

屏帷蠻毡隨步蹙溫溫香卷陣婉婉眉鬪綠微聞伊梁

音淥酒光動穀鮮醲片餉盡望姓空側目懼成庾郎哀

竊效杜陵哭冥頑鱷魚囊屢覆舟萬斛梟雄扈將軍謂福

建扈海元帥竟作机及烽火血齒腥草木地媪為

之愁兼恐河源熟聞靈胥廟歲祭莫敢黷三叫三醉

鴈願與赤水族錢王射強弩至今有遺鏃何當起英魂

少助八州督時汝穎等州陷中原日無事海寓蒙景福尚虞多

杜海集卷二
戕殘灑淚逃亡屋

月夜醉歸舟中二首

推篷滿船霜長嘯仰見月清光溢懷袖披拂青燐滅身不在隴頭無救水鳴咽

冰田一萬頃龍魚舞空明醉坐大蓮葉水底招台衡台衡光遠卻散髮自吹笙

題觀瀑圖

中天瀉雪瀑清氣涵澗谷餘濺落人間猶作珠萬斛手者誰子於焉送遐矚

天池石壁

翠微蓄天池白晝積水黑窪涵南斗天峽束太古石初月猿下飲先雷龍起蟄濯足者何人袖中有溟渤

鶴山下厲老人餉墨葺

老人餉墨葺殷勤貴適口形微柔上鷺味勝杞下狗山肴雜粒粒瓦盆注醇酎問我兵興來此樂可曾有

觀兵婁城

震雷過高城草木咸莠榮大江流春氣一雨暢民情靡靡冠蓋會蕭蕭車馬鳴無勞漢天子係虜賜長纓

少年快恩讎辭家建邊勳手中弄銑鏡目空萬馬羣
壁入不毛水咽山雷雲構還親撫哭悔識李將軍
義結豪俠場日趨燕趙風攻城數掠地帝賚主將功
玉帶十毬馬金鎗雙解弓弓馬分賜誰赤脈干綠瞳
大旗蕭蕭寒長槊列萬夫令下簸邏鳴鐵騎分四驅
塵黃日黑慘相視人色無鋒交血濺野首將方援枹
白日流銀河三五星芒寒牛馬臥草上帳幙羅雲端
鐔鼓春容鳴衆響獨鮮驩羣虜在吾目九地攢吾肝

彼虜或有人我師豈無名上計貴伐謀掩襲非示征
草塞狼反顧一水西流聲寇恟斬皇甫餘于烏足程
卻穀敦詩書祭遵事雅歌非才銜空名復敗誠不多
小范真我師匹馬雙導戈笑擁兵十萬夜下白鹿坡
大鈞播萬物無言自功成酈生掉寸舌不智遭鼎烹
非熊爲王師飯牛慙客卿轅門鼓角動整駕河漢橫

憶懷六首

陰風動長淮噴奮三江濬羈人滯中谷鬱鬱憂彌臻
躅躅就長道延企望清塵吳天回銀河魏闕直鉤陳
西來

一黃鵠翼欲覆八垠中焉離贈繳孝鳥共悲辛南服奠
會稽西江導岷岷休明始華夏攬轡諒有人
促織嘖嘖啼布穀交交鳴士無濟世念品庶同每生陰
陽運四時日月麗太清如何流離鳥卒不反善名滄江
增深波黃葉委前榮漏半笳始寂嘒彼星東橫天命自
阨窮民情何怔營懷哉古大聖待旦整朝纓
大星動欲落草木氣含霜驚風薄前營步騎勢翕張美
哉同心友劒佩相徬徨游鴻噉荒微兔窟崇岡旁顧
阻太湖不見舟與梁苟容諒非道單居念流光寒菊已

復花蟋蟀鳴我牀結交兩憂患夙好終不忘

征塵一何黃征衣一何素衣素易染塵况復冠帶具忽
忽葉變秋灑灑草溥露莽莽關山長悒悒歲月度豈無
新相知戀戀情如故范叔未至寒綈袍受良難

曜靈升扶桑萬彙希朝采故山互蔽虧新陰復晦靄楚
楚園葵花傾心若爲待凱風幸時拂天道從小改客有
採珠人遠渡鴨綠海歸懸雙明月家喪踰十載兵烽何
日息素念無時怠引領望反照桑榆四三在

倚蘭生窮谷偶與惡木鄰惡木集鴉鶻一旦摧斧斤歸

人白日晚躡履盼餘春滋露留古豔好風薦幽芬東君
義相望大夫惡得紉大夫紉秋佩卒染清路塵九節石
上蒲服食足葆也真自葆蘭甘谷中老

題梅花士女

彼美空谷人梅花是前身手披先天易心融大地春素
衣杲霜雪孤根堅石鐵不夢趙師雄長終抱明月

往歛名開化二鄉掩骼

分藩多賢勞不敏忝賓客雖無官守縻亦復與言責二
鄉虔劉禍慘甚長平厄先王制禮經孟春冓掩骼僕夫

有難色款段纔任策駸駸度岡坂眇眇循藪澤稍稍煙
微青歷歷野四白游魂行草上遺老候道側我豈物役
徒茲來出心臆皇天久下憫赤子非寇敵鴟鳥何不仁
銜啄血更瀝因歌戰城南風悲淚狼藉

題沈氏死節卷

有引

沈茗溪邵婦艾而美至正十六年為淮兵所逼投水
垂死今浙省都爭張英適過之命其下拯救得活且
諭曰汝配張官人不榮幸乎沈謝曰幸諸君活我我
以夫遇害知殉夫而已他忍聞也既置舟中夜四鼓

陰納束筍口中面舟木觸喉而死張葬焉

黃金無畱礦白璧難混瑕坤裳義安貞適然暗塵沙寧
死嗚咽水不望昌蒲花感君固存妾妾命薄如葉此心
許所天羅帶難再合君殊野鴛鴦妾非鬼蝴蝶清風何
搖搖吹彼溪上茗山光浮菑佩空響度瓊簫至今一坏
土民自戒芻樵

題福天然開土水木軒

軒榮彌清華一水帶嘉木幽光湛深黝餘潤裊高綠名
緇結長夏居然媚孤獨春辭灼灼芳日冷疎疎煜雲行

天體臥境靜物理燭時諷霞上篇遠縱林下躡本源苟
途舛文字徒形楛我來兩忘言山童報茶熟

題鄒伯常雲文閣

齋閣嘉樹寂幽徑綠苔滋美人琴尊暇焚香聊自怡天
書譎詭篆峰回裊窈姿因花紅變霧度草碧縈絲鵲尾
黃金鑄螭頭紫袖攜神徂榮願俱意適清賞隨疎漏下
深迥餘馥尚委蛇宴安諒加傲移以奉親知

題黃常叔彝友古齋

彼美特立士素為鄉里欽蟬蛻謝汗濁鳳歌邁遐深宿

雲曉承宇洞溪日循林囊餘不瑑玉壁有無弦琴琴貴
長蘊古玉貴弗售今羲皇陶所慕管樂葛同心是山出
地中來者仰崑岑聖緒存著述試扣洪鐘音

過楊員外別業

有序

至正十六年今大府開中吳時公先以杭州陷非罪
被黜依故人彰德路同知上海章元澤居或傳大府
將起公笑曰吾豈事二姓使果至公知不免往辭章
曰某行矣敢以家累君章曰友責當爾也既歸誨二
子卣卓事君立身之道乃就寢久之卣卓入見則縊

死矣案上得遺訓云死生如晝必有夜何足介懷吾
老矣獲全臣節死固甘心卣卓其以麻衣屨爲斂歲
時祭止蔬食此蓋晚年至願卣卓益立脩省勿遺人
誚也章殯之公名乘字文載濟南人少負氣博涉經
史由參議府掾累官拜監察御史遷浙省員外郎十
八年中外臺臣昭雪其前後事贈某諡某卣蔭山東
宣慰司都事卓清忠書院山長

翠羽無深策麝香無隱穴由來老蚌珠淚泣滄海月於
乎楊員外竟類膏自熱憶昨佐南省四境正騷屑朝廷

忌漢人軍事莫敢說遂懼池魚禍遄被柳惠黜寄身傍
江潭乃心在王室星躔錯吳分氣候乖鄒律天風搖青
鬢徒步空短髮譙元初謝遣龔勝終守節譬如百鍊鋼
不撓從寸折又如合抱松豈藉澗底孽我時浮扁舟鷗
外候朝日荒郊無留景別業自深鬱時清議勸忠公冤
果昭晰大名流天地當與河水竭結交卣卓閒遺言見
餘烈

三孀辭書陳衆仲監丞傳後

有引

相人李柔母陳兄嫂王王之女咸早寡守節里稱三

孀云

相州城中三羈雌相依相呼李樹枝青春雪白花照帷
淚痕點點鬢絲絲鬢絲日夜短淚痕無時斷將影對孤
月同虧不同滿鸞兮忍聞膠可煎舊御尚挂鴛央弦一
門孀居天使然辱天何敢況辱先生當同室死同穴史
筆遂屬陳莆田嗚呼歲暮空谷裏佳人無媒垂老矣

堂

東南名都萃炳靈山出萬朶芙蓉青其峯飛來最嶄絕

見之身欲生羽翎金晶蘊結天地秀石樓盤困巖洞扇
風高力鬼負鼇極月黑毛女捫牛星時維奔雷急雨歇
澗合源泉魚藻活數聲清磬猿嘯外百尺浮圖鶴巢未
重江復湖氣溟滓陰嵐晴霏翠輦轉挺拔多異材可望
不可識得非共命鳥銜種自西域古松曾經尊宿坐怪
藤一似蛟龍踏三友今日無凡憂探奇覽勝忘少休鏘
然矜佩崖壁面咳唾散落空中漚傳車官馬素不到到
此乃是高人儔牧樵往往說題誌焉用某職煩雕鏤人
生貴富如雲浮乘興再登雲上頭桂香載道酒波瀉還

坐大牀酣宴秋於平安得三友為我常追遊

北邱耕隱歌贈斡山謝逸人

九山西南來斡為北道主鬱積氣饋饅盤薄秀鍾聚神
丁剗卻蓬萊腹一鼇首戴莫茲土平原內史曾未睹崑
陰谷陽僅容與謝逸人者晉相孫玉樹其皎天球温素
歆李渤棲少室近比杜甫居東屯大田穰稷橫跨柳高
埭楊柳全遮門有作古詩好有釀新酒渾酒從席帽醉
詩對鐵笛論鐵笛謂楊廉夫提舉月下蘿蔦嘗同捫風露響落秋
林根崖顛夷曠擬築臥游閣泉竇寒冽願鑿杯飲尊頻

年目苦兵塵昏長材美箭無幾存
雨花洞鎖白蝠舞試
劍石泐蒼精奔蘇吳爲沼亦復見
龐公遺安良可羨自
今三老雲霞交他日無勞眞隱傳

新舊庵辭

新庵丹堊輝庭戶舊庵四壁穿風雨
新舊庵僧自相語
新者父葬舊者祖誦誦玉珮紫金魚
青松花開笑殺渠

連環歌

有序

連環歌爲杜先生夫婦而作也先生諱友開字陽父
世居江陰之君山教授數十年資束脩自奉妻吳辟

纏以助之天歷閒菑荒學徒散去先生竟餓死初吳
昆弟屢勸斬邱木粥墓地可少延性命先生在羸憊
中堅持不可繼欲挈吳以歸吳曰夫旣盡孝妾獨不
以義自處寧不食若粟遂相枕籍而卒後十一年逢
過其里獲見一古研乃先生故物其銘曰置之而水
凝淒然其似秋噓之而露泣熙然其似春惟有德以
自潤能不言而詔人何以觀之吐墨如雲觀此益信
其行噫先生之計善矣當是時穀價踴貴人食樹皮
糠覈非困於飢則殆乎殄矧二者懼於垂老待盡之

日必料邱木與墓地不過易斗斛粟活旬日而死寄
 客土且身受不孝之名尚從父母為地下遊乎先生
 卓然先見者以此吳生為士妻共患難同貧賤道也
 夫既委順於正又肯愛餘齡就食昆弟哉抑以昆弟
 之言非導人歸於義者也吳判然不移下從良人者
 以此噫亦義矣哉使二人有裹飯一君子則天理人
 倫未必章章鄉里況天下耶逢懼歲遠而事泯也故
 序而歌之歌曰

白玉雙連環在春申山山前夫婦義同死心與連環

鎮相似日月合照無欠虧天地相依其終始天地日月
 非彈丸環兮環兮冰雪寒

張春兒 有引

張春兒葉縣軍士李青之妻也至正戊子青病革時
 年甫二十青曰吾殆矣汝善事後人張截髮示信曰
 妾生寒門頗曉夫婦大義萬一不諱惟有死耳青卒
 哭之垢面流血且喻匠者造大棺將盡納其衣服劔
 器匠如其言既斂張自經庭樹下閭里遂同葬之有
 司上於省旌其墓復其家獨未有形容其心者故予

補歌一章

紅顏夫婿羽林兒汗馬未騎身早萎娶時衣裘不忍見
及將殉葬心思徧衣裘憑妾得歸土妾今無從苦復苦
誓為月魄入九泉長與地下夫團圓

憂傷四首上樊時中參政蘇伯脩運使

古青徐十連五屬桑棗墟黃河失經人化魚呂梁設險
豺為徒船多纜通玉帛貢車多始登牛馬途守無官軍
法度踈居無鉅室城隍虛欲去鹵掠當何如合置官軍
合實郡縣
古青徐歲久致君心煩紆

竹笠黃

時海寇戴竹
笠以拒官軍

黃金兜鍪勢相當兜鍪本居大將

壇左劔右印增威光邊隅將校望塵拜州縣曹佐聞風
僵況從元首授元柄稍忤言意違軍令不因菑疫自焚
船邗致生靈輕隕命竹笠黃兜鍪相當難走藏兜鍪且
晚先戎行

官柳場青茫茫野鷹交飛樸馬驤年年十月轅門張元
戎始來坐虎牀翼舒箕哆魚麗行鼓進金退兵家常起
伏見譏孫武子勾卒貽笑曹成王千夫散盡旌旗定偏
裨隊伍相呼應幾處私恩誤主恩一回酒令行軍令酒

醉邊隅事不聞邊隅擾擾多煙氛

江海壩家家浮生多在船船居無租出無禁競賣田宅
行鹽錢私鹽漸多法愈密隩裏干戈攘白日尋常惡孽
不宥除本固枝蕃禍非一虎符龍節王者師赦過錄功
先自欺諫臣止疏劾已晚蔓延及今歸咎誰地官合爲
宏遠計鹽價減徵同賦稅盜源旣清民瘼除五風十雨
歌康衢

送童子陽北上

中天繁星如撒沙婺女獨與金爭華金華山人應星象

南戶讀書滄紫霞銅盤沉瀼碧於水瑤草石芝香薜蘿
袖藏明月雙驪珠願獻元臣作充耳今年手分五朵雲
染成五色組繡文上期黼黻聖明帝下欲覆幬窮荒民
風寒雪暮陰曠昏梅花江國畱兼旬春潮一夜上沙尾
拂劍笑問黃河津黃河動地翻海渾銀漢滉瀆通昆侖
太行羊腸路九折不有壯志俱消魂吾王之門虎豹蹲
舐談曠眩毛牲牲楯郎戟士露肝膽不有意氣難爲倫
君才具美合致身少壯易老母逡巡商翁佐漢還遁去
魯連卻秦終隱淪功成名遂信有在贈言聊識平生親

小七首歌

水精生苗月牙直
 慧芒披雲電流隙
 螯蛇斷尾短草閒
 鶻褪翎霜雪色宋
 斤魯削讓隋刻金
 錯錐刀豈其敵
 鴻扈稽飛著體不
 曾為主開邊鄙
 嗟茲神物久泥滓
 之可以報國士
 簷冰卓筴日黯空
 稍玩股掌生雄風
 鮫魚穿臥縞帶影
 長鉞辟易萬雉墉
 古昔客堪秦王胸
 幾仆翠鳳咸陽宮
 由來意氣泰山重
 命甘燎毛不旋踵
 誰隳古制鑄小之
 佩稱衣冠加秘瑋
 我歌三歎淚滿襟
 曹鱣豫聶無時無

孫道絢 有引

龍江曾見可家藏
 宋樂府中載縉華
 鬼仙汝州官妓
 詞皆淫靡後讀建
 安黃雲軒知縣妻
 孫夫人醉思仙
 調曰霽霞紅看山
 凝暮紫煙暗孤松
 動霓裾風袂翩
 若警鴻心似鑿鬢
 如蓬弄清影月明
 中謾悲涼歲冉
 冉薜花潛改衰容
 前事消凝久十年
 光景忿忿念雲
 軒一夢回首春空
 采鳳遠玉簫寒夜
 悄悄恨無窮歎
 黃塵久埋玉斷腸
 揮淚東風殆見孤
 鳳於百鳥羣也
 因表出之孫名道
 絢中原人能文詞
 盛年嬌節卓偉

鄉族尊之云

白鶴山中雪衣女花靜春移綺窗戶夢逐雙鳧天外飛
影作孤鸞鏡中舞鏡中舞鳴聲悲殘編畱得斷腸詞天
寒翠袖渺何所日暮碧雲無限思

丁清風 有序

余作衛女引之明日於宋樂府復得一婦人焉曰蜀
士大夫妻丁氏美姿色善詩文自號清風居士宣和
閒夫浮家赴闕求調王黼薦丁姓名於禁中時尚文
女郎才慧者多得進於是有意召見丁曰吾夫庶官

吾非命婦安有入內見君之理不敢拜命且謂夫曰
君素非貪冒富貴者何苦自辱題詩汴邸竟不知所
如往詩曰西嶺雌雄鳥雙雙覽德輝陽臺遲雨散滄
海會塵飛夜月參差玉春雲窈窕衣君王宴阿母卻
寄碧桃歸是日客有語都城事有感併補一章

河洲冰膠雲塞野林棲雖鳩歸牝馬收書驚見雙青鸞
蕭郎弄玉風斯下金水暗侵燕地氛明月長挂眞珠裙
靚桃花碧宴紫府雙星在天靈夜語宣和皇帝何如主
投贈柯博士 名九思字敬仲

鍾阜天回王氣新
憶君扈從入楓宸
旋平內難繫弓矢
遂沐殊恩列搢紳
元宰或同司雨露
史官曾擬奏星辰
羽旌影動宮花日
龍鼎香傳禁樹春
白馬獨遊絲鞚好
縹醪雙賜玉壺醇
委蛇退食收金鑰
怵惕存心表翠珉
文皇常賜其父江西提學謙訓忠碑
三絕鄭虔親帝許
四愁平子舊誰倫
僑居暫作東吳客
奉引依然上國賓
稔歲葑田饒蠲稻
高秋松水長鱸純
神馳紫塞風生角
夢隔瑤池月照裊
白首馮唐仍晚遇
青袍杜甫豈長貧
明河近望清如洗
行駕仙槎復問津

客金陵遇有以茂才異等為薦者以病歸泊龍灣

二首寄丁仲安婁行所二先輩

柁樓醜酒出金陵
後衣裳體不勝風雨滿江寒
屬鼻庭闈何處髮鬚鬢
田璆實下諸侯榻
王式虛蒙博士徵
一曲雜歌凝客思
幾行疎樹隔漁燈
鳳皇臺上酒如川
醉擬題詩李謫仙
鑿齒已成耆舊傳
眞長空覓孝廉船
十年螢案書連屋
八月龍灣浪拍天
無那病懷兼旅思
白雲遙望夕陽邊

遊永壽宮

文皇帝潛邸時幸臨

六朝龍虎氣回春草木均沾雨露新羽葆蓋車雄萬乘
金銀觀闕現三神樓船不見歸童女桂館徒勞立從臣
深幸先皇潛邸日祝釐無乃爲生民

簡謝性原

同是風流王謝家雲萍漂轉各天涯忽逢落日烏衣巷
竝立東風白鼻騮蕉葉深杯情潦倒桃花團扇墨橫斜
賢人在位親無恙八月須乘奉使槎

題下砂場丞韓景陽世綵堂時親年八十

桐木韓家世綵堂五更環立珮蒼蒼晚年夢與雞聲遠

春日情無鶴髮長風細弦歌生暖響花交簾幙散清香
聖朝孝治恩尤洽兒得焚魚進壽觴

敬題直學士周公書贊先君庫使遺訓後贊附

吾平生持畏遇小事如大事面欺人不忍爲心欺神
明尤不忍爲也右庫使江陰王君惠之常以是言自
警其子逢求予書以爲家訓既爲作篆又爲贊曰人
心卽天天卽神明一欺吾心天罰是懲尤矣王君持
心孔平戒慎於微弗歉弗盈有子克紹學古行清銘
其庭訓終底於成番陽周伯琦書

先君遺訓幾經時大篆新承閣老爲三代鼎彝宗史籍
泰山銘刻陋秦斯雲霄上日瞻文藻雨露濡春起孝思
鄉里未歸身粗立搖搖寸草獨天知

題鄒旅雲青山老隱圖

有引

青山老隱圖者予友鄒君時昌追慕其先道鄉先生
而作也先生有墓有祠在毘陵青山門外中書左丞
呂公思誠爲浙憲時嘗展拜祠下命有司禁樵採後
毘陵失守時昌避地海上欲歸省不可得乃繪是圖
復自號曰青山老隱以示不忘首邱之義予敬題以

詩

青山郭外道鄉祠宰木溪毛幾歲時繡史罷伸芻牧禁
畫圖深寓釣游思疎星皓月飛烏鵲細雨東風過子規
更有張翰首邱賦倩子盥露寫烏絲

送何伯大判官辟中書掾從丞相出師

丞相興師出薊邱萬蹄千乘壓中州旌旗露溼星河曉
鼓角風高草木秋號令不聞鶯鶯列謀謨初定鬼神愁
獻俘太廟陳歌頌獨有儒曹業最優

送于子實辟淮閩掾

淮海風高急鼓鼙潁州烽起照淮西餽糧幾道通流馬
樓櫓重城望火雞星八夜寒芒角動地連秋暝瘴氛低
君今掉鞅元戎幕百慰流亡父老啼

寄鄧筠谷鍊師

別後雷巖結構成靈風灑掃四時清經緡白石天人下
屐響青林木客迎萬葉動星幽氣合三花垂露薄寒生
鶴雛長就車輪羽好在高秋載玉笙

題衛叔靜樂靜山房

名仁復七世從祖膚敏宋多
政七世祖上達禮部尚書

新營別業遠風埃山綠湖光故故來四壁有時聞葉墜

一門無事看花開圖傳龍馬尊家學冠護貂蟬憶
巢燕不隨浮世變將雛依舊拂蒼苔

寄題瑣憲臣萬戶星湖釣隱圖

笳鼓歸來理釣絲星連文石漾淪漪征袍漸喜團花暗
小艇還從細柳維邊地雪霜憐馬革五湖煙雨夢鴟夷
野人不待傳雙鯉鉤出珊瑚寄一枝

和沈掾中秋月

月入高天更漏遲天香消盡桂花枝金晶氣爽飄風露
銀漢波翻動鼓旗二星蟋蟀滿林羅袖溼駱駝千帳笛

聲悲柴門此夜光如練喜與休文一詠詩

送陳昌道北上

江海才名二十年振衣吳楚上幽燕交游豈在夔龍後
夢寐常居虎豹前天八紫微瞻爽氣野空黃落見疎煙
從征早下陳琳檄遂使三軍樂晏眠

題葉子澄雪篷軒

歲晚天寒雪一蓑滿船書畫壓銀河鮫人室露雙冰鯉
神女峰沈幾翠螺夢裏客星辭帝座尊前小海度漁歌
高明益進中庸學日看東家綠樹多

清碧軒宴坐簡汪文裕學正

萬竹無聲風露微野夫相對遂忘歸琴彈流水神魚出
目送遙天鶴雀飛自煮蓴絲同晚飯肯分苔色上春衣
廣文盛說休官好更覺閑情與世違

題夏士文書聲齋

璜溪溪上魯東家四壁無塵護絳紗春水研池窺乳燕
午香簾幙度飛花賓筵優禮同三釜祕閣遺書共五車
總羨韋賢家教美滿籛金碧視泥沙

題松江府學訓導胡師善遺跡後

有後序

春回澤國草青青不見斯人舊典刑守廟義同全趙璧
禦災心似哭秦庭蝸行薛壁畱題字燕入芸帷罷講經
百世祀從先哲後可能無憾久沈冥

師善名存道越人通春秋禮遊吳三十年無知之者
晚益奇頓意晏如也至正乙未冬僉憲趙承禧廉問
松江知其賢命知府崔思誠延之於學善慨然曰吾
不用於世亦庶幾淑諸人明年春二月叛將燔城善
親冒煙焰籲天呼地願捐生衛廟學俄大風返火未
幾參政楊完者調苗丁來守墮掠尤甚善語同舍林

以莊宋處元曰諸侯死社稷吾儒視學校毀於兵可
乎既矢石聲迫近善出與苗言學校不可毀於是遇
害明年逢避地海上謁先聖廟見善誌救火於廡壁
得臨死事實於進士潘元慶泊見予友孫作而又聞
嘗謂作曰城池多艱君有親可亟去吾以死扞廟學
廟學不存士日不競因感泣而別於乎善之死蓋不
待決於倉卒患難之間或者乃弗是之過矣夫朱泚
之亂何蕃一叱叛者遂爲儒宗今苗闕廟學士於其
時禮所謂朝不坐燕不與潔身引去固無可罪若胡

先生不徒然其死其志蓋可哀也逢以其生既不偶
死復泯泯乃爲賦詩且論列於左

和吉州何節婦詩韻

有序

何婦賀永新人至正十三年斬兵殺其夫將汚之賀
曰竊聞帥令嚴淫虐者斬以徇若獨不懼徇乎兵退
言諸帥議聘焉賀曰彼禁淫虐自欲委禽未亡人耶
未幾聘至賀閉戶不納齧指血題詩曰涇渭難分清
與濁妾身不幸厄紅巾孤兒尚忍更他姓烈女何曾
嫁二人白刃自揮心似鐵黃泉欲到骨如銀荒村日

落猿啼處過客聞之亦愴神遂列死東海徐憲趙郡

趙鎮先賦古風子和韻云

風塵旦暮未亡身
屍吠何堪動悅巾
斗血倒流三尺劍
九泉下見一心人
竹祠長夏飛蒼雪
月闕中天爛白銀
聞道琵琶亭在望
賣降舊鬼獨傷神

題張會嘉桶底圖

有後序

道者深藏玉斧才
罷脩明月下蓬萊
笑隨流水天台去
袖裏登州海市來
霧幌雲窗開翠壁
異薌靈響接瑤臺
神遊萬里愁回首
故國蒼涼獨鴈哀

右是圖出吾鄉葛氏葛氏世居青陽鄉宋名臣邴之後內附初家貧惟母在夫婦資賣酒以養凡爲具務罄利之入極母所嗜好或雨雪晦暮庭戶掃迹屢傾貲如其奉一夕有老道士酤百錢已宿焉明日夫婦蚤作候道士不見問諸保者曰道士酣寢時見一彈丸丹光奕奕射木榻外旣聞爪甲聲若蟲食桑葚然餘不知也夫婦驚惋熟視臥內惟有所刻畫榻底耳當是時好事者購墨本惟恐後而母氏卒賴以壽終君子謂葛夫婦孝感所致云

送陳檢校從藩臣分鎮淮安

闔閭城外陣雲興草木依微殺氣凝
雪霽長淮齊飲馬煙消清野疾飛鷹
羽林密號傳符刻幙府初筵列豆登
有道折衝千里外牙旗小隊看春燈

題天竺妙侍者所藏訶笑隱張伯雨倡和什後

湯休麗藻世無多脩靜清名孰有過
赤水元珠歸象罔寶花丈室散維摩
日邊竝倚凌雲作林下新傳擊壤歌
句曲長干舊游地鵲飛無奈月明何

山行二首 有序

庚子十月二日董竹林居士邀予出吳城西遊十餘里捨舟循花鹿白鶴等山度鳳凰峴觀紫牛洞遂登宋張監退觀亭故基斷岡殘隴四顧蔓草五世孫天祐讀書力穡其下忻然接子曰自兵興來學士大夫罕有至此者因題詩壁閒

水送山迎風滿衣
薜花梔子散林扉
紫牛一去洞雲合
白鶴重來人世非
亭倚高寒瓴甌在
仙游長夜珮環輝
諸孫爲具蒸藜餉
自笑登臨不當歸

是午由牛圈塢南行數里得覺林院少憩既西折登百餘步林楚就暝遂止興教寺僧源肅吾二人具酒饌沾醉乃寢五夜驚聞雨點聲甚繁載聽之蓋鐘振木葉墜露耳徐起盥櫛源備湯供延坐小軒軒面蒼峭壁泉玉色瀦壁下僅尋墨許指笑曰是足供千百衆然未有名予名曰咸泉取澤在山也移時以竹院飯偕眺尤美亭巘嶠斗絕捫蘿薦而上仰蓮峰殊神秀亂石虎搏人立杉楠榆楓相參錯爲丹崖翠壑天風泠泠迴見鳥背使人作凌虛想源云亭右垂有石扉側開陬隘纔容身中則寬廣時雲氣上齊

若葆蓋羽車然意必靈異所宮欲下燭幽隱辭姑名
曰靈雲之洞又言峰絕頂俯太湖洞庭光爽滿面宜
吾二人者老此或與飛仙接二人者董竹林居士其
一也居士吳產累遷儒官晚慕晉七賢用是號潛其
名云源愛儒文章因居士首倡四韻懇懇求和并紀
泉洞得名自予始詩曰

袖中詩卷杖頭錢十里雲山一宿緣
曙鐘響振珠林露天供香分石壁泉
葆蓋羽車靈岫出丹崖翠壑小亭連
擬吸具區三萬頃頡頏飛上大青蓮

題程達觀外史洞雲深處

洞雲深處神仙宅空翠不收常晝冥
金鵲尾橫香案靜青蛇影臥土花腥
天壇瑞草敷雷雨石竇寒泉注月星
更闢一甌高爽地遲予來守內黃庭

同鄭遂昌山人張谷賢俞樵夫
艤舟石湖登拜郊臺畱題上方寺

高秋木落紫嵐開載酒登臨第一回
亡國不無西子恨拜郊猶有僭王臺
上方樓閣中天倚直北風雲幾日來
三老班荆話閒樂石湖魚鳥莫驚猜

故封安陸府同知飛騎尉華亭縣男謝公德嘉挽

詞

執友懷材德人皆長者呼官封安陸府宅抱澱山湖華
胄遙通晉榮光近接吳書詩陳典雅環珥侍瑤瑜襟量

黃生匹交情鮑叔俱墓山依客鬼有義山葬寓公死者金帛貸家

奴奴嘗盜金置不問鱸釣蕙波闊池驚草露濡兵戈十年內不

忘禮王符

龍江治圃

原憲安貧久樊遲學圃初總名江泌菜不是鮑焦蔬甲

拆烽燒外心承雨澤餘酒香兼果蓏羹美帶蝦魚華髮

冰壺傳茅齋種樹書鶉衣分晚摘肉食鄙春鋤嗜欲情

除妄逍遙道集虛妻孥防歲饑甕盎備冬儲

洛陽靳惟正信州總管利安公之子太平總管處

宐公之從子太平先殉節死丞相達公以惟正廕

太平同知今將有事中朝枉顧海上時予病聊短

述以贈

梧竹鷓鸞羽蘭茗翡翠衿船船淞泖入圭竇草萊深藥

鍛夫容火冠投玳瑁簪山人非索價公子素存心天府

周南國電旌漢上林高秋使命返金玉俟徽音

送僧蘭古春亂後還省先塋

儒行蘭開士先塋在富春摸金無校尉挂劍有行人
露傷歌早松風入夢頻杯浮羅刹渡酒醉客星鄰天地
啼鵲血庭闈戰馬塵式瞻追遠義孝治若為臻

哭呂貞惠處士

南國長林楚西崑片玉英周旋鄉里難終始歲寒盟甲
第風塵合璜溪月露清義聲驪勇弁私試集文衡屢散
千金積還辭七品榮性中天爵重身外野袍輕柳送浮

春鷓花邀嘒曙鶯深期陪几杖俄報舉銘旌世亂嗟新
俊秋高哭老成名公題翠石來裔照華纓

節婦謝淑秀詩有序

謝淑秀宋太學上舍國光孫隱居教授進脩女淑性
閨敏年廿贅里中許楸室家雍穆逾十年楸蚤世有
女孟柔子龍困皆幼或者諷使再適圖終養計淑曰
吾不幸蚤寡猶幸生詩禮家不見奪於其姜之父母
又幸不見迫於媯覽呂超之權勢矧有母恃養無足
憂者吾惟志是守子是鞠承乃宗祀而已尚何言諷

者赧而退淑清苦自持及終母制孟柔歸某氏龍困
知樹立亟命學醫因誨曰夫醫治亂不廢之業且樹
德莫醫若汝其母忘後果亂龍困以醫母獨優裕今
六十餘歲矣人又以許賢母稱云

貞居婦謝氏名重陸雲鄉頭雪機猶織眉青瑟罷張野
霜遺秉淨池雨漚麻香團鏡收來匣長檠弄在牆壺圍
恬布素家廟肅珩璜祖澤詩書遠兒醫德業昌柏舟多
後勸柳絮有餘芳水落新魚鬣春回舊燕堂中庭嬌月
白四境戰塵黃倍感陶嬰操因之補一章

趙長者詩有序

趙長者名禮字信父泰州之丁溪人生而寬厚未冠
父聞同里孟翁女有容德爲聘之時女年十四矣初
翁有子女輒殤天晚得是女鍾愛之及笄以目疾瞽
翁□□辭婚於其父父以語長者長者曰不可始孟
氏□□時目固明非誑我也今不幸致此而悖常渝
盟遠近知其爲瞽女誰乎娶翁夫婦老且死女無適
從人必責我大義不若堅前好焉父喜謂其母曰吾
兒直有華陰呂氏之風後其昌乎既娶相敬如賓生

子孫
子女□一人玉其中子也中年家益饒迎翁夫婦就
養翁歿葬猶父鄉大夫士咸稱趙長者趙長者云長
者事親孝與兄裕弟璧無閒言以壽終於家玉之外
祖母嘗以子撫育之長而知讀書奉外祖母如其父
卒服衰三年歲時不絕其祀今爲水軍都萬戶
淑女春蘭秀仙郎玉樹姿目從何日瞽義守百年期團
月開紈扇雙星結綵襦輝唐鏡匣流響蜀琴絲遂叶
熊占夢旋生燕頰兒德齊中饋禮恩出外家慈蒿蕤俄
□□□繁數歲時留題長者傳庶望厚民彝

宮中行樂詞六首

羽獵罷長楊宸遊入未央鸞開雙畫扇鶴舞百霓裳玉
蓋瓊花露金盤紫蔗霜長門誰閉月流影在倉琅
望幸影娥池微吟紈扇詞露盤迎月早宮漏出花遲珮
雜響和響雲連雉尾移君王宵時顧從愛趙昭儀
明月窺彤管雙星直闕軒宴分王母樂詔授薛濤箋穀
雨新蠶近花朝拾翠連魚龍曼衍戲次進玉階前
積翠激波闊披香暖殿開天低烽火樹日動蔓金苔懶
髓勻猶溼羊車過不同騰陳烈女史萬一漢皇來

芍藥爲離草鴛鴦是匹禽君無神女夢妾有楚王心日
短黃金屋宵長綠綺琴相將戒霜露拜月繡簾陰
金鑰魚司夜瑤箏鴈列春後庭通綺閣清路接芳塵同
備三千數誰辭第一人君王壽萬歲行樂此時均

聽葉琴師觀光操

有序

觀光操者三衢毛敏仲所作也至元閒仲偕武林葉
蘭坡徐秋山遊京師三人者咸能琴受知宰執薦名
世祖皇帝仲以爲士之道莫尚於賓王先王之化尤
莫尚有虞氏之教故緣徵度聲作是操以應制比召

客死館舍予聞其音激越悽惋不純乎徵傳曰徵亂
則哀仲其自哀也夫雖然仲之心至矣是時海內外
羣生萬物方芴達交暢仲首擬南薰之歌用啟聖聰
比隆有虞中道而止豈先王之樂未當復歟於乎先
王之樂不見復於世皇制作之日畢竟何時興耶使
後有吳季子必曰樂有在也蘭坡孫惟一彈是操且
語是言因序其事而系以詩

夜聽觀光操心神四座開馬駝千里道龍虎五雲臺長
養南薰入紆餘白雪來世皇虛席待竟起伯可哀

觀楊一枝外史鳴球琴 元贊附

溫潤而實玉其質也清越不淫磬其音也朝陽之桐
弦徽被之彼美天球維其似之

驪龍珠四八共爾久浮沈造化深藏器神明密賞音水
蒼寒軫玉星緯暗徽金拂拭煩君手朝陽作鳳吟

得尚書汪公凶問

凶問落江邊儒林氣愴然亂中天未定身後日同懸孝
甚曾三金廉殊寵一錢樗材荷推獎思報輯遺編

錢公義舟中同賦

薄暮扁舟發春陰生野寒赤莖看水柳清響送風湍詩
好頻分札篷低屢整冠松鱸九峯酒爛漫罄餘歡

娼婦徐至正壬辰冬微人寇常召其婦佐燕憤
罵弗聽寇馳殺之龍江章琬孟文詩附

妾非花月舊時妖會事忠良樂聖朝今日黃巾刀下死
陽城下蔡莫魂消

東帶朝衣供奉孫虜庭歎死報皇恩妾今一唱貞元曲
孰濺西風碧血痕

平康巷裏掌中身翠舞珠歌玉樹春不得籍徐今義
死天容娼婦愧降臣

和成婦陳聞鴈有感四首 有引

浪喜燈花落又生夜寒頻放剪刀聲游鴻不寄征夫
信顧影娉婷無限情右婦陳聞鴈而作題於華亭成
壁逢友張洙宗魯和一首青蘋風起別鴻生寒盡春
來不寄聲多少離羣歸欲盡天涯拋棄獨何情謝嘉
維則擬荅陳二首軍裏何曾髀肉生隴頭日夜血流
聲內人莫怨孤征鴈縱寄安書莫寄情缺月微明瘴
霧生兩鄉夢斷王簫聲無由竝跨秦臺鳳夜夜離鴻
鶴情宗魯曰陳錢塘儒家女夫本縣曹吏因兵亂

隸軍籍久在外或勸曰若質美性慧往富室為女紅
不猶愈守空戍忍寒飢乎陳荅曰寒飢小事耳不已
察而汝聽失節莫大焉或者慚而退未幾夫挈歸里
人至今稱之

雌見月可憐生月落江昏過鴈聲不特題詩想夫婿

少玉關情

多年蟻蝨生客窗今夜落邊聲螭頭釵子鴛央股

挑燈萬里情

兩地何知死與生鴈來愁聽月邊聲多應萬里孤飛影

只抵長門一片情

江南江北荻花生妾處君邊第一聲何似春風湖上宅
銀箏玉柱白頭情

海宴軒前雙鴛鴦歌為曹涇分鎮朱芹湖作

盛明天子狩有期鴛鴦若有神靈司剛風高寒翅盡直
鷹師縱鷹雲眼碧斯須毛血灑行輦太官親庖奉玉膳
當時畿甸禁罟嚴此日江淮矰弋滿朱然將軍興義風
雌雄養之庭苑中文王沼上古月白房相池頭春草豐
飲泉啄穀觀者美願爾雙飛上筵几亂離無復鳳來儀

雄多被殺畱其雌將軍必也放歸北天子厭兵今節食

題楊元誠太史宮詞後 有後序

三珮瓊瑤雅頌詞流傳中禁萬方知獨憐夜草除姦詔

奉綸音改到時

公嘗與范滂同草黜逐伯顏太師之詔草文云詔書
到日上日自早至暮皆一日也可改作到時結句故
云

題謝太傅小像

一起扶維半壁天未應絲竹醉嬋娟八公北下風雲冷

想見山河月影全

吳江書所見

虬髯使者銀貂裘胡牀醉酒芙蓉舟文章太守不敢近
一聲水調勤回頭
檣頭船兒葉不如漁郎衝風暮打魚傷人心怖自歌笑
老龍正在江潭居

題郡守翟仲直太白問月圖

玉醪和露瀉頗黎鯨吸秋空萬象低奈爾浮雲翳明月
清光不照夜郎西

景陽井

踏臂歌殘璧月昏騎龍猶藉井生存石闌漫浣胭脂色
不似湘筠淚灑痕

簡任伯溫檢校

旌旗交影鳳池邊退食微聞午漏傳猶比至元無事日
印文銅綠長苔錢

官廚日送葡萄酒畫省春看芍藥闌不忘舊爲丞相掾
手圖天馬獻金鑾

丙申正月十八夜吳門雨黑雨廿二日午見日中

黑子劉都漕貢總管雷不果既出舟次口號

始憂黑雨夜傾城又駭無雲日晦明百口親鄰船倚著
仲宣去住獨含情

仲雍墓側晚烽青頭白鳥啼滿驛亭太守心旌懸大樹
故人書劍逐浮萍

靜安招提八詠為寧無為上人作

碑存赤烏年僧指青燈夜風雨寒蕭蕭黃旗儼來下赤烏

水怪移象罔野火飛熠燿丈夫殉節榮足免行殯清滬

壘

故國空蚯蚓老檜餘瓔珞根地終系陳不與庭花落陳朝

檜

神僧聊示現肉眼為驚睥水淨天空雲何緣同一莞鰕子

禪

縹帙白象籤金書貝多葉稍披四句偈已斷七支業金經

臺

甘香蟻邱漿清涼楊枝露一勺徧大千天龍不敢吐涌泉

亭

秋風兩岸著野水千家遶隻履自東歸零亂霜天曉子蘆

渡
龍歸驟覺寒雞遠不知午長年四簷陰颼颼竹疑雨雲綠

梧溪集卷第二

